

Noticia  
Transparente  
di Gobierno

# ISLA ONLINE

Dialuna 20 Mei 2024

Email: [IslaOnline@gobierno.aw](mailto:IslaOnline@gobierno.aw) Tel: 528-4952

ARTE DI MURAYA  
SAN NICOLAS



Gabinete Wever-Croes





**Un potret ta bisa mas cu mil palabra**

## **EXPOSICION FOTOGRAFICO "PROBLEMANAN SOCIAL Y SOLUCIONNAN" DI STUDIENTENAN DI UNIVERSIDAD DI ARUBA**



Diahuebs anochi 16 di mei, Prome Minister Evelyn Wever-Croes a wordo invita pa corta e cinta durante e inauguracion di e exposicion fotografico di studiantenan di Universidad di Aruba, "Problemanan Social y Solucionnan".

E studiantenan cu a haci e exposicion ta di e facultad di Art & Science di Universidad di Aruba y ta studiando pa bira trahado social. Pa esaki e hobennan a sigui un curso di fotografia y por a mira un resultado hopi profesional. Prome Minister a menciona cu e tema di e exposicion "Problemanan Social y Solucionnan" ta uno hopi interesante ya cu e ta muestra a traves di e arte di un potret e problema, pero tambe e solucion pa esaki, cual ta hala atencion ya cu un problema tur hende por pensa riba dj'e pero e echo cu e studiantenan a busca pa cada problema un solucion y present'e den nan arte, esey ta di admira.

Durante e anochi aki Prome Minister a wordo deleita cu potretnan di calidad halto, impactante, exponi den e tecnica preto cu blanco y color y cada tecnica haciendo e impacto den e storia cu cada estudiante a trece dilanti. Un potret ta bisa mas cu mil palabra y e arte cu a wordo exponi a refleha esaki mustrandocu cada problema tin un solucion den bida.

Por remarca cu un estudiante, Joanne Ignacio, pa su proyecto a scoge e tema di Prome Minister di Aruba pa enfatisa e problema di e trato desigual di hende muhe na Aruba basa



riba estudionan cu e mes a haci pa su proyecto. E solucion pa e problema aki, segun conclusionnan di Joanne, ta e echo cu un hende muhe ta e Prome Minister di Aruba na e momento aki. Esey ta kibra e plafon di glas y ta crea oportunidad pa mas hende muhe na Aruba.

E mandatario a keda impresiona cu e talento di e studiantenan, cu e calidad di e fotografia di e exposicion, pero specialmente el a keda impacta cu e storia cu cada hoben a conta di su potret. Esey ta muestra e calidad di trahadonan social cu Aruba lo tin den futuro. E ta un profesion hopi noble cu un tarea hopi importante.

Tin problemanan social serio na Aruba ya cu e pais ta den pleno recuperacion y cu e recuperacion ta bin cu retonan y problemanan social y Aruba mester di mas profesionalnan riba e tereno aki.

"Un exposicion masha interesante. Mi ta felicita e studiantenan pa e proyecto aki. Un pabien na cada un di boso pa expresa e mensahe cu boso ta trece dilanti di e forma aki. Danki pa scoge e profesion noble aki, Aruba tin mester di boso. Tambe mi ta gradici Universidad di Aruba, UNOCA, e mayornan y tur esnan cu a duna sosten na e studiantenan pa asina nan por a realisa e exposicion impresionante aki", Prome Minister a expresa. ■■■







## Prome Minister Evelyn Wever-Croes: REUNION ENTRE PROME MINISTER Y ATIA PA TRATA DIFERENTE PUNTO



Dialuna 20 di mei, Prome Minister Evelyn Wever-Croes a reuni cu Aruba Trade and Industry Association (ATIA). Durante e mainta aki e mandatario a cera conoci cu e directiva nobo bou e presidencia di señor Danilo Werleman y e Director señor Herrick Henriquez.

Principalmente e reunion tawata pa trata diferente punto di relevancia pa ATIA. Entre otro a papia riba e mercado laboral di Aruba y e scarsedad di trahado y e efecto riba varios sector na Aruba. Otro tema cu a wordo trata extensamente ta e proceduranan di Gobierno pa hisa e eficiencia y mehora servicio y di e rol di E-Government y e digitalisacion di e proceduranan aki.

Un tema di gran interes di ATIA ta riba e funcionamiento di e Departamentonan di Infrastructura den e caso di DIP y DOW. Prome Minister a splica cu den caso di DIP, Gobierno a cuminsa cu diferente accion caba. Tin un accion pa adelanta peticionnan y pronto lo duna resultado cu henter e comunidad lo por mira. E mandatario tambe a informa ATIA cu na e momento aki tin un reorganizacion andando na DIP y a haci un investigacion pa mira cua ta e riesgonan cu ainda por tin den e proceduranan cu por conduci na corrupcion na cierto momento. E meta di Gabinete Wever-Croes ta pa medio di e investigacion aki, elimina corrupcion totalmente y asina evita echonan di pasado ripiti, unda cu prome cu su maneho, tawatin ministernan di



infrastructura cu a haya problema cu husticia.

Otro topico importante pa ATIA ta esun di RWZI. Riba esaki Prome Minister a informa cu e ley ta na Parlamento pa privatisa RWZI y cuminsa soluciona e problema serio aki. Finalmente a bin dilanti e tema di Hulanda y e tema financiero y e mandatario a splica cu Gobierno di Aruba ta sigui na mesa cu Hulanda y cu e tin confiansa cu pronto lo haya e solucion na beneficio di Aruba. “Mi ta gradici representantenan di ATIA pa nan tempo y interes. Nos tawata tin un bon reunion, cu temanan di gran importancia y lo sigui tene reunionan regularmente cu ATIA”, Prome Minister a remarca. ■



**Prome Minister Evelyn Wever-Croes:**

# **PRESENTACION DI RESULTADO DI ENCUESTA NACIONAL STEPS 2023**

**A logra colecta informacion for di ciudadanonan relaciona cu nan salud, estilo di bida y salud mental**

Diabierna anochi dia 17 di mei, Ministerio di Salud Publico a presenta e resultado di e Encuesta Nacional STEPS 2023.

STEPS ta un encuesta nacional cu a inicia na 2023 unda despues di un training intensivo, 20 encuestado a bishita diferente cas rond di Aruba. E meta tawata pa logra colecta informacion for di mas di 5000 ciudadano entre edad di 18 cu 69 aña relaciona cu nan salud, estilo di bida y salud mental.


Prome Minister Evelyn Wever-Croes, presente pa e ocasion, ta splica cu e resultado di e encuesta aki ta preocupante ya cu e ta indica cu casi 80% di e poblacion di Aruba tin sobrepeso y di un alrededor di 50% tin obesidad. E cifra di personanan cu presion halto tambe ta halto y ta muestra cu hopi di nan a haya medicamento pa esaki pero no ta sigui cu e tratamiento. Otro cifra halto ta esun di e consumo di alcohol. E uzo di tabaco tin cifra menos alarmante pero si ta muestra cu e uzo ta halto entre e hobennan.

E datonan aki ta duna un linea basico y Ministerio di Salud Publico, encabesa pa Minister Dangui Oduber hunto cu Gobierno di Aruba, ta trahando caba riba varios proyecto di prevencion pa asina den futuro e cifranan aki por mehora.

Prome Minister ta remarca cu ta importante pa cada ciudadano tuma rienda di su salud y di su famia desde trempa den bida, sino e chens ta grandi cu den futuro por tin un of mas complicacion di salud. Tur hende kier un bon calidad di bida y esey ta cuminsa cu un bida saludabel.

Prome Minister ta gradici PAHO (Pan American Health Organization) y WHO (World Health Organization) pa nan asistencia y apoyo cu e encuesta aki cu ta un herment importante pa Gobierno di Aruba y cu esaki lo traha riba e miho maneho posibel pa cu e tema aki.

“Di parti di PAHO, nan a elogia e ekipo di Ministerio di Salud, bou liderazgo di Minister Dangui Oduber mescos esun di Minister Rocco Tjon di Asuntonan Social den e caso especificamente aki cu tema salud mental, pa nan dinamismo y pasion cu nan tin y pa nan determinacion pa yega na un solucion pa e tema dificil aki. Cu e datonan aki, cu personanan dedica y profesionalnan bon prepara, nos lo por yega hopi leu den e lucha pa baha e cifranan aki y asina yuda nos pueblo pa tin un miho salud y miho calidad di bida”, Prome Minister a expresa.







## PIONERO DEN TURISMO SR. MICHEAL KUIPERI A RICIBI UN RECONOCIMIENTO DI EXCELENCIA DI GOBIERNO DI ARUBA

**A percura pa fundeshi fuerte pa turismo cu cultura di nos Pais como motor**

Diaranson atardi Ministernan Maduro y Croes a ricibi e pionero den turismo di Aruba, sr. Micheal Kuiperi pa asina den nomber di Minister President Evelyn Wever-Croes entrega na su persona un Reconocimiento di Excelencia di Gobierno di Aruba.

Sr. Michael Kuiperi tabata e prome director di Oficina di Turismo di Aruba y a percura pa traha un fundeshi fuerte pa desaroya e industria di turismo na Aruba. Danki na su vision, curashi, creatividad y trabou duro, Aruba a yega riba e mapa internacional como destino turistico. Sr. Kuiperi a percura pa, entre otro, e prome vuelonan di Merca pa Aruba via Puerto Rico y di e manera eyan a sa di pone e fundeshi pa e diferente vuelonan directo cu a sigui di Merca pa Aruba.

Ta importante pa menciona cu sr. Micheal Kuiperi a traha incansablemente pa Aruba su cultura wordo conoci, nos musica rezona y nos artistanan local briya riba escenarionan internacional di turismo, pa di e manera aki haci e turista curioso pa bishita Aruba. Danki na e trabou pionero di conecta turismo y cultura di Aruba, awendia e turista cu ta bishita Aruba no ta bin solamente pa e 'Sun, Sea, or Sand,' pero nan ta mas interesa pa e 'Soul' di Aruba cu ta e cultura di nos Pais.

Pa Minister Maduro di Cultura e tabata un honor y placer inmenso pa den nomber di Minister President Evelyn Wever-Croes por a dedica algun palabra di gratitud y brinda sr. Micheal Kuiperi e reconocimiento special aki di Gobierno di Aruba den presencia di Minister Glenbert Croes y nieto di sr. Kuiperi, sr. Micheal Leo van Rommond. "Nos ta hopi gradici na sr. Micheal Kuiperi pa su vision, trabou duro y specialmente pa e amor pa Aruba cu cual sr. Kuiperi a traha na pone e fundeshi fuerte pa Aruba su industria di turismo. Masha danki pa conecta y reconoce e importancia di nos cultura como motor tras di turismo di nos Pais," tabata palabranan expresa pa Minister Maduro na e bunita ocasion pa reconoce e pionero den turismo, sr. Micheal Kuiperi. ■■■











## MINISTER DANGUI ODUBER A HIBA PALABRA NA E GRADUADONAN DI XAVIER UNIVERSITY Y HAYA RECONOCIMIENTO



Diabierna mainta Minister di Turismo y Salud tabata invita na e Global Health Leadership Summit, organisa pa Xavier University School of Medicine (XUSOM). E evento aki tabata un celebracion pa un grupo di graduado di XUSOM. Na luna di April 56 graduado di Xavier a logra drenta universidadnan na Merca, Canada y Australia pa sigui nan estudio den medicina. Y na luna di Mei 49 estudiante a gradua cu nan degree di MD. Tabata un honor pa Minister Oduber dirigi algun palabra na e studentenan aki.

XUSOM ta un universidad na Aruba di medicina, unda apart di educa nan tambe ta contribui organizando diferente ferianan di salud como parti voluntario di e institucion. Esaki ta un bunita ehempel na unda nan ta duna bek na e comunidad di Aruba, brindando servicio di salud y informacion directamente na nos pueblo.

Minister a hiba discurso, unda e la enfoca ariba e sistema di cuido di Aruba cual ta dedica na e principio di prevencion.

Prevencion ta un parti importante den inversionan di cuido. Ministerio di salud ta reconoce cu e fundeshi pa tin un comunidad saludabel ta pa introduci medidanan proactivo, pa asina tambe evita malesanan cronico cu ta e causa principal di morto y desabilidad na mundo. Prevencion no solamente ta trece mehoracion den calidad di bida pa e comunidad, pero tambe ta sigura un sistema di cuido di salud sostenibel cu por cubri e necesidadnan di generacionnan pa futuro.

Durante e ceremonia Minister Oduber a haya un reconocimiento special for di XUSOM pa e manera excepcional cu a maneha e pandemia di Covid-19. XUSOM a reconoce e trabounan y a expresa gratitud pa loke Minister Oduber a haci y ta haciendo pa salud publico na Aruba.

Minister Dangui Oduber a termina felicitando tur graduado y a deseana hopi exito pa cu nan futuro. Tambe Minister Oduber a gradici XUSOM pa ta un ehempel di excelencia y pa sigui ta involvi proactivo den nos comunidad. ■





## MINISTER GEOFFREY WEVER A REPRESENTA ARUBA NA E HIGH LEVEL POSTAL FORUM NA WASHINGTON



E siman aki Minister Geoffrey Wever hunto cu director di Post Aruba N.V. Sr. Guillermo Raymond a representa Aruba na e High Level Postal Forum pa Centro America, Caribe y otro paisnan strategico na Washington D.C. Minister Wever y Sr. Raymond a wordo invita dor di Union Postal de Las Americas, España y Portugal y Universal Postal Union pa debate riba reforma di e sector postal riba nivel global.

Den tur pais e sector Postal tin reto, y riba e nivel di mas halto gubernamental a organisa un forum pa asina intercambia di idea, debati y acorda reformanan legislativo y operacional. E organisacionnan internacional a propone diferente forma con pa modernisa e sector postal entre otro door di reforma e legislacion y sera alianzanan strategico.

Durante e forum Aruba a wordo ofreci asistencia tecnico pa modernisa e sector postal na Aruba. Mirando e importancia di e reunion aki riba nivel di gobiernonan di paisnan miembro, tur gasto di hotel, ticket y estadia a wordo completamente cubri dor di e organizacion postal internacional.

"Awo ta na Aruba pa acepta formalmente e oferta pa asistencia tecnico y cuminsa cu e implementacion. Nos a cera alianzanan importante y haci palabracion concreto con nos lo



traha hunto bayendo padilanti den interes di e sector postal internacional y local, pues den beneficio di Post Aruba N.V. y henter comunidad Arubiano", segun Minister Geoffrey Wever.





## MINISTER ENDY CROES A COMBERSA CU E INSTRUCTORNAN DI LANDAMENTO ESCOLAR



Diaranson mainta, Minister Endy Croes hunto cu directora di Departamento di Enseñansa (DEA) Sra. Anne Marie Proveyer - Groot a realisa un bishita oficial na Piscina Olimpico Roly Bisslik na Savaneta, unda cu a reuni cu Sr. Andy Gomes, kende ta dirigi e proyecto di Landamento Escolar.

Sr. Gomes a duna presentacion di e proyecto y a elabora riba diferente inkietud. Landamento Escolar ta cumpliendo 32 aña y alrededor di 1400 alumno ta participa tur aña den e proyecto aki. For di comienso di aña escolar un grupo grandi di alumno ta participa y lo realisa e examen pa haya e diploma A y B den e luna di juni proximo. Sr. Andy Gomes a indica cu durante e encuentro a trata diferente inkietud, a duna informacion actualisa di e proyecto y e cambionan cu nan ta desea di mira den futuro. Banda di esaki, Minister Endy Croes a combersa cu e instructornan di landamento, unda cu el a scucha nan preocupacionnan y a contesta nan preguntanan.

“Pa e proximo aña escolar e proyecto aki ta bay bek lama na Palm Beach. Lo keda uza e Piscina Olimpico pa e scolnan den cercania. Pa loke ta trata e lama di Baby Beach, esaki ta den planificacion”, Minister Endy Croes a informa. Pa loke ta trata uniform y material di oficina e mandatario di Enseñansa y Deporte a compromete cu e lo cumpli cu nan prome cu aña escolar 2023-2024 finalisa. “Nos ta contento di mira e cantidad di scol cu ta participa tur aña den e bunita proyecto aki” Minister Endy Croes a enfatisa. Pa conclui, e mandatario di Enseñansa y Deporte ta gradici pa e caluroso recepcion y e mainta ameno. “Hunto nos mester traha e plan pa mehoracion di e bunita proyecto aki”, Minister Endy Croes a finalisa. ■





**Minister Endy Croes:**

# **LO INSTITUI MUSEUM BETICO CROES DEN CURASON DI SANTA CRUZ NA CAS DI KERIDO MAYORNAN DI NOS LIDER INMORTAL**

**Cas cu un balor historico na unda nos gran libertador a lanta y crece**



Recientemente, Minister Endy Croes a reuni cu e comision Museum Betico Croes, lidera pa e mandatario di Enseñansa y Deporte y Stichting Museum Betico Croes. Desde aña pasa, ta antentiendo cu e bunita proyecto Museum Betico Croes. Lo institui Museum Betico Croes den curason di Santa Cruz na cas di kerido mayornan di nos Libertador Betico Croes (den feliz memoria), caminda nos lider inmortal a crece.

Un proyecto educativo cu balor historico, den cual e scolnan por bishita pa siña e historia di nos Libertador Betico Croes. A haci un “site-visit” caba na e sitio pa evalua e concepto. Durante e reunion, e arkitekto Sr. Jouel Croes a duna un presentacion di e cambio grandinan cu lo bin rond di e edificio aki. Fuera di esaki, Sr. Renwick Heronimo consehero experto di museum a duna un presentacion di e concepto di e Museum Betico Croes.

Mas en adelante, lo comparti e presentacion aki cu Consejo di Minister, pa asina Gobierno di Aruba duna sosten na e bunita proyecto Museum Betico Croes. Asina cu e concepto ta completamente cla den luna di juni, lo duna un presentacion oficial na e comunidad. Pa finalisa, Minister Endy Croes ta felicita e comision y Stichting Museum Betico Croes cu ta trahando duro pa realisa e bunita proyecto aki den curason di Santa Cruz. ■





# EN CONEXION CU WEGANAN ESCOLAR 2024, MINISTER ENDY CROES HUNTO CU MASCOTA WIWI A BISHITA COLEGIO CONRADO CORONEL

**E gran apertura ta tuma luga dia 1 di juni na Compleho Deportivo Nadi Croes & Crismo Angela**



En conexion cu Weganan Escolar 2024, Minister Endy Croes hunto cu mascota Wiwi a bishita dialuna mainta scol basico y preparatorio Colegio Conrado Coronel. Manera ta conoci, Weganan Escolar 2024 ta tuma luga di 1 di juni pa 15 di juni proximo. Pues dos siman di competencia, unda e scolnan lo bataya contra otro pa conquista e titulo maximo. Colegio Conrado Coronel a clasifica den casi tur disciplina y un total di 58 alumno ta competiendo den Weganan Escolar. Riba peticion di e mandatario di Deporte tur scol cu ta participa na Weganan Escolar riba dialuna ta hisa bandera di Aruba y bandera di Weganan Escolar. E meta di esaki ta pa inculca e amor patria den nos hobennan. Wiwi tambe tabata tey pa saluda e alumnonan y trece animo pa e Weganan Escolar.



Cabesante di Colegio Conrado Coronel Sra. Lourdes Vries a indica cu tabata un honor cu e scol por a ricibi bishita di Minister Endy Croes. E mandatario di Deporte por a presencia e motivacion cu e scol tin pa Weganan Escolar. Durante e ceremonia, a hisa e bandera y canta e himno di Aruba, a hisa e bandera di Weganan Escolar y a canta e himno di e scol. "E alumno- y maestronan ta hopi motiva pa Weganan Escolar", Sra. Vries a enfatisa. Alabes Sra. Vries ta desea tur scol hopi exito y specialmente e alumnonan di Colegio Conrado Coronel, boso por, nos ta bay p'e! Pa conclui, Minister Endy Croes ta felicita cabesante, maestro, staf y tur cu a contribui pa haci mainta aki uno bunita y exitoso. Hopi exito na e alumnonan. Cu e deseo, disciplina, dedicacion y determinacion ta logra.





# MINISTER ENDY CROES TA FELICITA E 104 CURSISTANAN CU A FINALISA E CURSO BIBA AMOR EXITOSAMENTE



Diahuebs anochi, a tuma luga entrega di certificado na 104 cursista cu a finalisa e curso di educacion sexual Biba Amor exitosamente. Na september 2023, Dienst Publieke Scholen (DPS) a introduci e programa di educacion sexual Biba Amor na e klasnan 5 y 6 di scol basico. E meta di Biba Amor ta pa crea conscientisacion, baha e cifra di embarazo hubenil y stimula nos hobenan pa haci escogencia sano. E lesnan a trata diferente topico entre otro, norma y balor, conoce bo mes y contacto cu mayor.

Tambe, a pone hopi enfasis riba e aspecto social, emocional y bienestar en general di e hoben. DPS a ofrece e dianan di capacitacion na maestro, maestro di movecion y salud, cabesante, IB'ers y SMW'ers y a organisa diferente ronda di informacion pa mayor. E training y programa a ser facilita door di Sra. BSc. Pharetza Berdat-Damon cu cooperacion di Ministerio di Salud, Ambiente y Naturalesa di Curaçao. E proyecto a conta cu cooperacion estrecho di Wit Gele Kruis Aruba Departamento di Tiernemoeder, encabesa pa Sra. Monique Giel - Labad.

Minister Endy Croes tabata presente na e ceremonia, unda el a hiba palabra y a felicita e 104 cursistanan. Sra. Pharetza Berdat-Damon a indica cu den nomber di Ministerio di Salud, Ambiente y Naturalesa di Curaçao tabata un placer di por a duna un aporte na e educacion saludabel di e hobennan na Aruba, unda cu a brinda informacion alcaso pa asina nan mes por tuma un decision cu ta aporta na nan desaroyo sexual saludabel. Por ultimo, e mandatario di Enseñansa y Deporte ta gradici Sra. Pharetza Berdat-Damon, ekipo di DPS esta, Sra. Morela Dirkz, Sra. Marylou, Sra. Richenella Croes-Wever, Sr. Johnny Tromp y Sr. Junny Oleana cu a haci e proyecto aki posibel y exitoso.





# MINISTER ENDY CROES TA FELICITA E CURSISTANAN CU A RICIBI NAN CERTIFICADO DI EMPRENDIMIENTO DEN DEPORTE

Diabierna ultimo, Minister di Enseñansa y Deporte Endy Croes hunto cu colega Colega Geoffrey Wever a acudi na Ceremonia di Certificacion di Emprendimento den Deporte (Sport Entrepreneurship) di Iniciativa pa Desaroyo di Empresa Arubano (IDEA). Esaki ta un momento di orguyo pa nos deporte y pa nos pais Aruba. Di e 18 participantenan, un total di 13 persona a logra e certificado, demostrando nan dedicacion cu nan a participa na 70% of mas di 70% di e tayernan.

Ademas, tin 5 otro participante cu a logra un parti di nan participacion di entre 50% y 68%. Durante e curso di 22 dia, nan a trata 9 diferente topico. E curso a inicia dia 30 di october 2023 y a culmina dia 26 di februari 2024. Minister Endy Croes ta gradici Departamento di Asuntonan Economico, Comercio y Industria/IDEA y colega Minister Geoffrey Wever pa nan esfuerzo y liderazgo den e promocion y realizacion di e proyecto pionero di Emprendimento den Deporte cu a termina cu un exito total. Alabes, ta gradici e facilitadonan cu a duna e cursonan. Nan innovacion y dedicacion ta un ehempel di inspiracion pa nos tur. Finalmente, ta felicita tur esnan cu a logra pasa e curso aki exitosamente. ■■■■





# MINISTER THIJSSEN A BISHITA FRED JOB FAIR NA AMSTERDAM

Minister Plenipotenciario mr. Ady Thijsen a bishita e FRED Job Fair cual a tuma lugar e weekend aki na Krasnapolsky hotel na Amsterdam. Na e FRED a participa diferente companianan, institutonan di Curaçao, Sint Maarten, Boneiro, St. Eustatius, Saba, Surnam y Aruba.

Minister Thijsen a tene un discurso unda ela splica kico ta e vision y maneho di Gabinete di Aruba. Cu esaki ta basa riba cinco pilar cu ta consisti di e trabao rond di Consejo di Minister di Reino (RMR), contactonan cu ministerionan, Eerste y Tweede Kamer y cu institutonan importante manera Raad van State, Nationale Ombudsman y Hoge Raad. Tambe e relacion cu Union Europeo, principalmente via di OCTA. E mandatario a sigi bisa cu parti di su maneho ta pa drenta den contacto cu municipionan (gemeenten), provincianan, Hogeschoolnan, Universidad, sector priva y otro institutonan pa mira na yega na cooperacion cu por ta beneficioso pa Aruba. Esaki segun sr. Thijsen den su discurso tambe ta conta pa e contactonan cu embahadan. E di cinco pilar ta e comunidad Arubiano na Hulanda. 'Esaki ta conta tanto pa nos hendenan cu ta biba y traha na Hulanda, como esnan cu a bin Hulanda pa trato medico. Un otro grupo cu tambe ta hopi importante ta nos studiantenan. Dunanan guia no ta conta solamente den nan estudio, pero tambe den e parti social den e comunidad Hulandes. Asina nos por fortifica e laso cu nos studiantenan pa asina tambe tin mihor bista si nan ta encontra problema of nos por tuma nota di signalnan cu por strobe nan den nan estudio of hasta pone cu nan ta stop cu nan estudio,' asina sr. Thijsen a bisa.

E mandatario a bisa cu un bon contacto cu nos studiantenan ta sumamente importante pa nos por purba na trece nos hendenan bek Aruba. Minister Thijsen: 'Door di e crecimiento economico y tambe cu e aumento den personanan cu ta bai cu pensioen (vergrijzing) ta hopi importante pa e cuponan di trabao aki, keda yena cu nos mesun hendenan. Pa esaki nos mester di nos partnernan social; no unicamente e sector publico, pero tambe e sector priva lo mester bai hunga un rol importante den e proceso pa trece nos hendenan bek Aruba. Esaki por cuminsa na condicionnan di trabao aun mas atractivo. Aunke nos no por contra e concurrencia di condicionan di trabao cu Hulanda, pero si lo mester mira na manera nan cu ta yega den e direccion ey. Asina e hobennan profesional tin opcionan den cual nan por escohe y spera cu e balansa cai na e banda bon y cu nan scohe pa bai Aruba bek. Un acuerdo social lo por ta un bon forma pa realisa esaki. Nos hendenan ta desea di tin estabilidad y seguridad den e mercado laboral y asina construi nan futuro riba dje.'

Minister Thijsen finalmente tabata tin palabra di elogio pa iniciativanan manera FRED pa trece companianan di nos pais Hulanda pa asina purba di recruta hende pa bai traha na Aruba y e otro pais y islanan den Caribe.

Despues di e discurso di Minister Thijsen a sigi un discusion riba turismo sostenibel, unda Jaap Ellis di ATA Europa, Reuella Berg di Aruba Marriott y Patricia Muñoz Checa di Iberostar a elabora riba e tema aki mira for di e aspecto di Aruba



Durante e resto di e merdia Minister Thijsen a cana pasa na e standnan di e companianan Arubiano pa informa su mes di nan experiencia na e FRED 2024.





## Gabinete Wever-Croes

Murayanan na San Nicolas, cu un tempo tawata silencioso y senciyo, a bira inspiracion pa creatividad dinamico di varios artista. Cada arte di muraya ta un celebracion di diversidad, cultura y union, dunando bida na murayanan y transforma nan den obranan maestro.

# 2024

AÑA DI STABILIDAD Y PROSPERIDAD